



Siaran
AKHBAR
KEMENTERIAN PERTAHANAN MALAYSIA

MOD.100/2/1/2 JLD 5 () 07/10

**PENGORBANAN 550 VETERAN ANGKATAN TENTERA MALAYSIA TERBELA
DENGAN PENGIKTIRAFAN MENERUSI PENGANUGERAHAN PINGAT JASA
MALAYSIA (PJM) OLEH MENTERI PERTAHANAN MALAYSIA**

Negeri Sembilan, 26 Oktober 2023 - **Yang Berhormat Dato' Seri Utama Haji Mohamad Bin Haji Hasan, Menteri Pertahanan** telah menyempurnakan Majlis Penganugerahan PJM kepada 550 orang Veteran ATM, balu serta wakil waris di Dewan Majestic, Port Dickson, Negeri Sembilan.

Majlis penganugerahan PJM tersebut telah dikoordinasikan oleh Jabatan Hal Ehwal Veteran (JHEV) ATM bermula 3 Mac 2004. Penganugerahan pingat ini merupakan pengiktirafan kepada anggota tentera di atas sifat keperwiraan, keberanian, pengorbanan dan kesetiaan mereka semasa berhadapan dengan ancaman pengganas komunis suatu ketika dahulu. Sehingga hari ini, seramai 39,720 warga Veteran ATM telah menerima PJM. Kejayaan bekas anggota tentera membanteras ancaman komunis selain memenuhi syarat-syarat yang telah ditetapkan seperti berikut, telah melayakkan mereka dianugerahkan dengan PJM:

- a. Telah berkhidmat atau terlibat dalam operasi secara berterusan selama 3 bulan dan ke atas atau telah bertugas secara langsung tidak kurang dari 6 bulan di mana-mana pasukan atau formasi ATM bagi tempoh dari 1 Januari 1969 hingga 2 Disember 1989 bagi operasi menentang Parti Komunis Malaya (PKM) atau,
- b. Telah berkhidmat atau terlibat dalam operasi secara berterusan selama 3 bulan dan ke atas atau telah bertugas secara tidak langsung tidak kurang dari 6 bulan di mana-mana pasukan atau formasi ATM bagi tempoh 1 Januari 1969 hingga 17 Oktober 1990 bagi operasi menentang Parti Komunis Kalimantan Utara (PKKU) atau,
- c. Telah terbunuh, cedera atau menjadi kurang upaya disebabkan oleh tugas menentang pengganas Parti Komunis Malaya (PKM) bagi tempoh 1 Januari 1969 hingga 2 Disember 1989 atau pengganas Parti Komunis Kalimantan (PKKU) bagi tempoh 1 Januari 1969 hingga 17 Oktober 1990.

Yang Berhormat Dato' Seri Utama Haji Mohamad bin Haji Hasan mengucapkan setinggi-tinggi tahniah dan syabas kepada semua penerima PJM pada hari ini. Kementerian Pertahanan sentiasa prihatin dengan nasib dan hal ehwal yang berkaitan dengan Veteran ATM. Malah, aspek kesejahteraan Veteran ATM telah menjadi salah satu teras utama iaitu **Transformasi Kesejahteraan Veteran ATM** dalam **Pelan Strategik Mindef 2021 – 2025**. JHEV ATM akan terus menambahbaik perkhidmatan dalam agenda memperkasakan kebajikan Veteran ATM dan meneruskan usaha untuk mencari pendekatan terbaik dalam meningkatkan taraf kehidupan Veteran ATM khususnya dalam keadaan ekonomi yang tidak menentu dan kos sara hidup yang meningkat.

Penganugerahan ini merupakan kurniaan atas sikap keperwiraan dan pengorbanan anggota tentera dalam melaksanakan kewajipan kepada negara. Sesuai dengan tarafnya sebagai "*campaign medal*" yang berlandaskan pengorbanan dan perjuangan yang tidak berbelah bahagi semasa darurat dahulu, PJM telah dimartabatkan sebagai pingat yang lebih kanan dalam susunannya berbanding dengan anugerah-anugerah yang sama kelas dengannya seperti Pingat Perkhidmatan Negara Bangsa-bangsa Bersatu (PNBB) dan Pingat Perkhidmatan Setia (PPS).

Pengurniaan PJM ini adalah refleksi terhadap suatu pengorbanan yang amat besar, yang diiktiraf oleh rakyat dan negara dalam menggalas tanggungjawab menjaga kedaulatan dan keselamatan negara dengan penuh taat setia. Masyarakat haruslah menghargai jasa dan pengorbanan para pahlawan negara sehingga negara ini dapat mengecapi keamanan yang dinikmati pada hari ini. Beliau turut merakamkan setinggi-tinggi penghargaan dan ucapan terima kasih kepada pihak penganjur iaitu JHEV ATM kerana telah berjaya menganjurkan Majlis Penganugerahan PJM pada hari ini.

Turut hadir dalam Majlis Penganugerahan ini ialah Ketua Setiausaha Kementerian Pertahanan, Panglima-panglima Perkhidmatan, Pegawai Kanan Kementerian Pertahanan dan ATM, Ketua Pengarah Jabatan Hal Ehwal Veteran ATM serta wakil-wakil Persatuan Veteran ATM Negeri Sembilan.

Untuk sebarang pertanyaan, sila hubungi **Pegawai Staf 2 Media (Laut), Unit Komunikasi Strategik, Kementerian Pertahanan, Lt Kdr Mohamad Ridzwan bin Mohamad Yusoff TLDM** ditalian **013-245 4622** atau **Ketua Unit Komunikasi Korporat JHEV ATM, Encik Muhammad Izzat Siraj bin Mohd Iyas Zainal Ravi** ditalian **017-965 3755**.

-TAMAT-

"MALAYSIA MADANI"

"BERKHIDMAT UNTUK NEGARA"

"PERTAHANAN NEGARA TANGGUNGJAWAB BERSAMA"

Kementerian Pertahanan Malaysia
26 Oktober 2023